

BIA

Mia woan so Buam,  
Bia xoffn hamma  
& i geh aussu ind Nocht –  
schiffn.

A Floschn in da Hand.  
I setz as an  
& loss rinnan.  
Obn eini,  
untn aussu.

Ob des schun amool  
ana gmocht hot,  
hob i mi gfrogt.

Kannst annehman,  
hob i ma denkt.  
Sicha!

Wann i do da Erste  
gwesn waa....  
Hätt ma iagendwie taugt.

## MARÜLLN

Wannst a Marülln heanimmst –  
frisch brockt –  
no kana hots angrüaht  
& du mochstas auf,

dann tuast wos,  
vos no Kana  
vua dia taun hot,

nocha siehst wos,  
vos no Kana vua  
dia xegn hot:

Den Kean vun  
dera Marülln.

Des muasst da vuastölln.

Ols ersta Mensch  
auf da weitn,  
weitn Wölt.

Ausgerechnet du,

den Kean  
vun genau  
dera Marülln.

## A HÖLD

Is aufstandn  
& da Kotz aufitretn.

Hot Kaffee gmocht –  
& s Häfal obigschmissn.

Is aufs Häusl gangan –  
& hot ka Papia ghobt.

Hot si anzogn –  
& en Knopf ausgrissn.

Wullt Schöpfn fohrn –  
& bringt en Wogn net an.

Nimmtn Bus –  
& kummt zspot ind Hockn.

HOT GSCHÖPFT, GSCHÖPFT, GSCHÖPFT.

Wullt ohne Koatn wieda ham  
& hot Strof zohlt.

Wullt Essn gehn –  
& hot ka Göld mea ghobt.

Is liegn gangan,  
& hot si denkt:

Wuascht,  
so isas Lebn!  
Eh –  
a Tog wia  
da andare!

## GIERIG

Aamol,  
hob i gmant  
i brauchat wos  
in n Mogn,  
sofuat, unbedingt,  
augnblicklich.  
Fliag eini ins  
erstbeste Wiatshaus,  
bestöll  
& krieg an Fross  
den i mein Hund  
net vuasetzn tät.  
I putz vua lauta Gia  
olls weg  
& geh speibn.

Laad woa ma ums Göld.  
A Oat schlechts Gwissn  
hob i ghobt,  
a gschissanes Gfühl  
wia schunamol...

des woa...

do bin i amol  
noch an Fullrausch  
aufgewocht  
mit soo an Schädli,  
in an fremdn Bett;  
vua meine Augn –  
ganz vaschwumman –  
a oog gmustate Tapetn.  
I drah mi vaschreckt um,  
liegt nebn mia ane,  
a Unbekannte,  
mit grosse Augn,  
schaut mi lang an  
& frogt:

„Was wiast du jetzt  
von mir denken, Schatzi?“

Bin i aa mit  
so an Gefühl  
hamgangen.

## TEUFLNOAMOL

Des geht net,  
des a net,  
des net,  
des net  
&  
des a net.

Nix geht mea.

Die Tüa  
geht a net mea zua.

Des müassat jo  
mitn Teufl zuagehn.

Mitn Teufl,  
mit dem muasst redn,  
so lang bissa sogt:  
Des is a Redn,  
so gehts.

Wal –  
dea hot am meistn zredn,  
heutigntox.

Olls geht mitn Teufl zua.  
Die Tüa a.

Des glaubst net?

Dann schaut holt amol,  
wias zuageht,

wosd hinschaust.

## WEGN EN GELD

10 Joahr –  
10 Joahr is des Haus  
leergstandn,  
des klane do  
am Eck –  
10 Joahr.

Kana hots hobm wulln.  
An jedn hots graust.

Wal,  
do ham  
2 Buam  
2 olte Weiba  
killt.

Wegn en Göld.

2 olte Weiba,  
de wos  
nocha vafault san  
in den Haus,  
in den Häusl  
& noch  
aussagstunkn,  
aussagmodat ham  
unta da Tüa.

An jedn hots graust.  
10 Joahr  
is leergstandn.

& jetz?

Jetz is a Bank drin  
in den Haus,  
in den Häusl do  
am Eck.

## SOWIESO

Wannst nix xoffn host,  
& ana frogt di,  
obst wos xoffn host,  
& du soxt:  
I hob nix xoffn,  
dann sogta sicha:  
Des is typisch  
füa die Xoffanan,  
dass ostreitn,  
dass wos xoffn ham.

Wannst xogt häst:  
Jo, i hob wos xoffn,  
hätta sicha xogt:  
I hobs e glei xegn,  
dassd wos xoffn host.

Wannst nix soxt,  
auf so a Frog,  
sogt da a Jeda:  
Ka Antwuat,  
is a a Antwuat.

(Wos sovühl hasst wia:  
Brauchst e nix sogn,  
i wassas e dassd  
xoffn host.)

Fraage:  
Wos muass ana sogn  
oda tuan,  
dass dea,  
dea wos an frogt,  
obma wos xoffn hot,  
nochan glabt,  
dassma nüachtan is?

(Wuascht,



obma jetz  
totsächlich  
was xoffn hot  
oda net.)

## DEA DO

Dea do  
is so a Dodl,  
is so ein Depp,  
do muasst aufpassn.

Wannst den sogst,  
hetzholba:  
Griass di!  
Geh ham & daschiass di!

Kanns sein  
dassas mocht,  
dassas echt mocht.

Dassa ham geht,  
a Gwehr nimmt  
& si aafoch daschiasst.

Dea Dodl

dea deppate!

Ohne Schmäh

## VUAN KINDAWOGN

1

Wem ghörtn des Zuzi?  
Jo wem ghörtn des Zuzi?  
Is des dei Zuzi?  
Is des der Tamara ihr Zuzi?

Nein!  
Neineineineineinn!  
Des is der Tante ihr Zuzi,  
der Tante ihr Zuzi is des.  
Tante will auch Zuzi.  
H m m m m m m m,  
gutes Zuzi!  
Guuuutes zuzi!

Jo was denn?  
Jo wos iserl denn?  
Jo wos hamma den jetz?  
Jo wer wird denn gleich weinen?  
Brauchst jo nix weinen.  
Is jo eh dei Zuzi.  
Daaa haaast!

Freilich is dei Zuzi.  
Braucht Tamara nix weinen.  
Guuutes Zuzi!  
Ghört jo sou dia!  
Jo souwiesou!

Wer wirdn gleich weinen!  
Tante hat ja nua Spass gmacht.  
Was hat die Tante gmacht?  
Mit der Tamara?

Nur Spass gmacht.  
Gell?

Freilich!

2

dududududu

jo

dududududududu

jo

dudududududududu

du

du

du

du

du

du

duuu

3

Des Letztemol

heb i da n jetz auf,

en Zutz,

des Letztemol.

Di Omi is nix

dei Nega,

du Krot

du klane!